

# Asisko gutuna

2021eko apirila

2. printzipioa. Eguneroko bizimodua: barnerantz, umiltasuna

150. zenbakia

Asis Sarea eguneroko bizimoduan espiritualtasun frantziskotarra ezagutu edo partekatu nahi duten lagunen sare sozial irekia da.

Beti gara geure buruarekin harritzeko gai. Ezagutzen duguna baino gehiago gara. Beti dago gehiago deskubritzeko, apaltasunez.

## Gogoetarako gaia

### *Erresistentziak*

Zenbat aldiz pentsatu ote dugu bizitzan aurrera egiteko urratsak ematea, eta aldaketarako erresistentziekin topo egin gure baitan. Berrikuntza-asmu horiek bizitzaren edozein esparrutan izan daitezke: bizitza osasuntsuago bat eta Jainkoarengako harremana, elkartasun-ekintzak, desberdinari harrera egitea, nire mugak onartzea, lan-ohiturak aldatzea, etab.

Bizitzan, harremanetan, fedean erosokeritan erortzen eta alfer bihurtzen ari garela ikusita, desinstalatzeko eta aldatzeko konponbideak jartzea erabaki genuen. Borondaterik onena jartzen dugu eta denbora eta ahalegina inbertitzen ditugu. Hala ere, aldi baten ondoren, aldaketa erabaki baino lehenagoko dinamiketara itzultzen gaituen zerbait gehiago dagoela ikusi dugu gure baitan. Ez dugu amore eman nahi, baina dena zegoen bezala uzteko joera uste baino handiagoa da. Esaten dugu: "Boluntarismo hutsa izan da", "Jada ez gaude gauza handietarako", "Nork sartu nau honetan?"... Funtsean, jakin dugu espero baino erresistentzia handiagoak ditugula eta horiek edozein aurrerapen zapuztu dezaketela.

Hala eta guztiz ere, posible eta desiragarria da pentsatutako urratsak ematea eta gure bizitza aldatzen deskubritzea. Horrek adierazi nahi du guregan ez duela erabakitzen alferkeriak eta amore emateak. Egia da badirela oso errotuta dauzka-gun ezkutuko erresistentziak gure baitan, ia gure zati direnak; gure borondaterik onena baino barrurago baleude bezala. Eta hala ere, baldintzatzuten gaituzten baina erabat determinatzen ez gaituzten erresistentzia horiek baino gehiago garela sumatzen dugu.

Erresistentziarik handienak Jainkoarenganako konfiantza-harremanaren aferetan agertzen dira. Zenbat arrazoi ageriko eta burutsu nire bizitzaren motorra Bera izan ez dadin! Geure burua zuritzen dugu: "Ez gara heroiak", "Ez naiz santua", "Hau besteentzat da", "Ez al da hau harrotasun hutsa izango?..." Apaltasun ekintzarik handiena bere nahiaren aurrean jartzea izango da. Agian gure indarrak urritzean bakarrik iritsiko gara bere presentziaren aurrean agertzeko umiltasunak eskatzen duen heldutasun mailara, erresistentzia handirik gabe.

## Ebanjelioko pasartea: Mt 19,16-22

Behin batez, gazte batek Jesusengana hurbildu eta esan zion: —“Maisu, zer onik egin behar dut, betiko bizia eskuratzeko?” Jesusek erantzun zion: —“Zergatik galdetzen didazu onari buruz? Jainkoa bakarrik da ona. Betiko bizian sartu nahi baduzu, gorde aginduak.” —Zein agindu?” galdetu zion. Eta Jesusek: —“Ez hil inor, ez egin aduleriorik, ez ostu, ez egin gezurrezko testigantzarik, ohoratu aita-amak, eta maitatu lagun hurkoa zeure burua bezala”. Gazteak, orduan: —“Hori guztia bete dut; zer falta dut oraindik?” Jesusek erantzun zion: —“Guztiz ona izan nahi baduzu, zoaz, saldu zeure ondasunak eta eman behartsuei, zeure aberastasuna zeruan izan dezazun; gero, zatoz eta jarraitu niri.” Hitz hauek entzutean, atsekabez alde egin zuen gazteak, ondasun handien jabe baitzen.

## Frantziskotar espiritualtasuna

Behin, Anconako Marka eskualdean, santuaren prediku baten ondoren, gizaseme bat etorri zitzaion, Ordenan sartzea apalki eskatuz. Santuak esan zion: jainkoaren pobreekin elkartu nahi baduzu, banatu lehenengo zeure ondasunak munduko behartsuen artean».

Hori entzutean, joan zen gizona eta, haragiaren maitasunak eraginik, ahaideen artean banatu zituen ondasunak, pobreei ezer eman gabe. Santuarengana itzuli eta bere eskuzabaltasun harrigarriaren berri eman zionean, aitak esan zion irribarrez: «Zoaz zeure bidetik, anaia eulia, ez baitzara oraindik etxetik eta ahai-deetatik atera. Ondasunak zeure odolekoei eman dizkiezu eta pobreei kendu; ez zara pobre santuekin bizitzeko duin. Haragitik hasi zara eta, beraz, zeure eraikuntza espiritualari oinarri galgarria jarri diozu». Giza irizpide hutsez gidaturiko gizon hark, beretarrengana itzuliz, ondasunak berreskuratu zituen eta, pobreei eman nahi ez zizkienez, laster asko utzi zuen bertan behera bere bertute-asmoa.

Asko dira gaur egun ondasunak banatzeko modu deitoragarri honek engainatzen dituenak: jokaera mundutar horrekin ematen diote hasiera biziera santuari. Baina inork ez dio bere burua Jaunari sagaritzen bere etxeoak aberasteko. baizik eta, errukiaren ordainarekin bere bekatuetatik askatuz, on egiten iraunez betiko bizia lortzeko. (2Zel 81).

## Otoitza

Jainko Aita Ona, gida nazazu,  
lagun nazazu nire ibilbidean,  
Zureganako zorientasunerantz.  
Ez utzi, Jauna.  
utz dezadan  
hasitako bidea.  
Erakutsi itxaropentsu izaten  
nahiz eta emaitzarik ez ikusi;  
lanean jarraitzen  
pazientziaz  
porrotak gorabehera.

Bihotzberritze bidean  
alde batera utzi behar ditut  
ibiltzeko astun eta  
nekagarri zaidan guztia.  
Baina uste dut, Jauna,  
Zuk nire nahiak ezagutzen dituzula  
eta ez duzula nire bizitza  
antzua izaten utziko.  
Maite dudalako sinesten dut eta espero dut  
eta maitatua izatea behar dudalako.  
Eta nik badakit, Jauna,  
Zuk maite nauzula.  
Amen.

Huesca-ko Klaratar ahizpak)

## Gutuneko azken hitzak

"Apaltasunean ematen den ahulezia da ahalmenik handiena" (Hiponako Agustin)

### 2021eko apirileko eguneroko Ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen dauzkate erreferentzia guztiak:

1 Jn 13,1-15	9 Jn 21,1-14	17 Jn 6,16-21	25 Jn 10,11-18
2. Jn 18,1-19,42	10 Mk 16,9-15	18 Lk 24,35-48	26. Mt 5,13-16
3 Mt 28,1-10	11 Jn 20,19-31	19 Jn 6,22-29	27. Jn 10,22-30
4 Jn 20,1-9	12. Jn 3,1-8	20 Jn 6,30-35	28. Jn 12,44-50
5 Mt 28,8-15	13 Jn 3,5a.7b-15	21 Jn 6,35-40	29. Mt 11,25-30
6 Jn 20,11-18	14 Jn 3,16-21	22 Jn 6,44-51	30. Jn 14,1-6
7 Lk 24,13-35	15 Jn 3,31-36	23 Jn 6,52-59	
8 Lk 24,35-48	16 Jn 6,1-15	24 Jn 6,60-69	

Geure web gunea bisitatu

[www.asissarea.org](http://www.asissarea.org)



  
Asis Sarea

646 21 48 96

Apirileko otoitza hila-  
ren 29ean izango da.